

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : PUAN ALICE LAU KIONG YIENG [LANANG]

TARIKH : 12 NOVEMBER 2018 (ISNIN)

SOALAN :

Puan Alice Lau Kiong Yieng [Lanang] minta **MENTERI PEMBANGUNAN WANITA, KELUARGA DAN MASYARAKAT** menyatakan status terkini Daftar Kanak-kanak dan apakah cabaran dalam pelaksanaan.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 12 NOVEMBER 2018 (ISNIN)

SOALAN :

Tuan Ahmad Fahmi bin Mohamed Fadzil [Lembah Pantai] minta
MENTERI PEMBANGUNAN WANITA, KELUARGA DAN MASYARAKAT
menyatakan adakah Kerajaan bersedia untuk mewujudkan satu daftar
pesalah seks (*sex offenders registry*) bagi kegunaan agensi-agens
penguatkuasaan.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : DATO' NGEH KOO HAM [BERUAS]

TARIKH : 13 NOVEMBER 2018 (SELASA)

SOALAN :

Dato' Ngeh Koo Ham [Beruas] minta **MENTERI PEMBANGUNAN WANITA, KELUARGA DAN MASYARAKAT** menyatakan berapakah jumlah penjenayah terhadap kanak-kanak yang telah disenaraikan di dalam daftar kanak-kanak dan apakah tindakan yang sudah atau sedang diambil untuk memastikan kanak-kanak dilindungi daripada penjenayah-penjenayah ini.

**JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA DAN
MASYARAKAT**

Tuan Yang di-Pertua,

Saya mohon izin untuk menjawab soalan daripada **YB Lanang** dan **YB Lembah Pantai** pada 12 November 2018 serta **YB Beruas** pada 13 November 2018 bersekali kerana pertanyaan-pertanyaan tersebut saling berkait.

Bagi menangani isu penganiayaan, penderaan dan pengabaian kanak-kanak yang sebilangan besar dilakukan oleh ahli keluarga atau mereka yang mengendalikan kanak-kanak, Kementerian Pembangunan Wanita, Keluarga dan Masyarakat telah meminda Akta Kanak-kanak 2001 pada tahun 2016. Antara pindaannya ialah maklumat pelaku yang disabitkan kesalahan jenayah terhadap kanak-kanak telah dimasukkan ke dalam peruntukan seksyen mengenai Daftar Kanak-kanak.

Sejak penguatkuasaan pindaan akta ini mulai tahun 2017, seramai 536 orang pesalah yang disabitkan dengan kesalahan jenayah terhadap kanak-kanak telah didaftarkan secara manual ke dalam Daftar Kanak-kanak oleh Pegawai Kebajikan Masyarakat di daerah. Antara cabaran dalam proses pengumpulan maklumat pelaku yang disabitkan kesalahan jenayah serta permohonan saringan rekod jenayah pekerja oleh majikan dalam industri perkhidmatan kanak-kanak bagi Daftar Kanak-kanak adalah seperti berikut:-

- i) Kesukaran melengkapkan maklumat pelaku yang disabitkan kesalahan terhadap kanak-kanak yang terdapat di agensi seperti Polis Diraja Malaysia(PDRM) dan Mahkamah kerana ketiadaan penyelarasan pinalunan maklumat yang diperlukan antara agensi-agensi berkaitan;
- ii) Maklumat pelaku yang disabitkan kesalahan jenayah terhadap kanak-kanak tidak komprehensif dan terhad kepada kes perlindungan kanak-kanak kendalian JKM sahaja. Manakala kes kanak-kanak yang tidak dirujuk kepada JKM tidak didaftarkan dalam Daftar tersebut;

- iii) Maklumat sedia ada dalam Daftar Kanak-kanak terhad kepada jenis-jenis kesalahan terhadap kanak-kanak di bawah Akta Kanak-Kanak 2001 dan tidak meliputi jenis kesalahan jenayah daripada undang-undang lain seperti Kanun Keseksaan;
- iv) Keperluan semak silang (*cross-checking*) dengan PDRM apabila suatu permohonan penyaringan rekod jenayah dibuat. Maklumat sedia ada dalam Daftar Kanak-kanak sedia ada tidak menyeluruh.

Berdasarkan cabaran pengumpulan maklumat pelaku disabitkan kesalahan jenayah yang terhad maka fungsi Daftar Kanak-Kanak bagi penyaringan bagi mereka yang berurusan atau mengendalikan kanak-kanak tidak dapat dilaksanakan sepenuhnya mengikut keperluan pewujudan daftar tersebut. Justeru itu, promosi bagi menggalakkan semakan ke atas Daftar tidak diperluaskan selama ini kerana dikhuatiri terdapat individu yang terlepas daripada sistem saringan disebabkan oleh maklumat yang tidak lengkap.

Tuan Yang di-Pertua,

Namun begitu, Kementerian ini melihat keperluan mempunyai satu sistem saringan yang lengkap mesti diadakan kerana kes-kes penderaan kanak-kanak semakin bertambah. Bagi perspektif penyaringan terhadap pelaku yang disabitkan kesalahan jenayah (*working with children check*), Kementerian sedang membangunkan satu sistem semakan terhadap penjenayah. Bagi tujuan ini, Kementerian dengan kerjasama MAMPU sedang berkolaborasi dengan pihak PDRM, Mahkamah, Penjara dan lain-lain agensi berkaitan menggunakan kepakaran serta sumber sedia ada bagi membangunkan sistem tersebut. Melalui sistem ini, pihak sekolah, institusi kanak-kanak, Taska, pusat jagaan atau pengusaha bas sekolah boleh melakukan semakan terhadap kakitangan atau pekerja bagi memastikan individu yang mempunyai rekod sabitan jenayah tidak diambil bekerja dalam industri yang berkaitan dengan kanak-kanak. Mesyuarat telah pun diadakan dan sekarang dalam proses pelaksanaan.

Sebagai rumusan dari perspektif perlindungan kanak-kanak, pembangunan sistem Daftar Kanak-kanak akan memudahkan proses pendaftaran, penyeliaan, intervensi dan pemantauan kanak-kanak yang memerlukan

pemeliharaan dan perlindungan di Pejabat Kebajikan Masyarakat Daerah secara atas talian. Bagi penyelidik, akses kepada sistem daftar kanak-kanak menyediakan maklumat yang diperlukan dalam kajian. Penemuan kajian dapat digunakan untuk merangka program-program bagi manfaat perlindungan kanak-kanak pada masa hadapan.

Jadi secara rumusan, kita mempunyai daftar kanak-kanak sedia ada tetapi mempunyai banyak kelemahan dalam sistem ini. *Moving forward*, Kementerian sedang dalam proses melaksanakan satu *working with children check* yang membolehkan semua pihak yang mempunyai akses kepada kanak-kanak melakukan sistem saringan ini, ada *screening to be done* kerana kita jangka sistem saringan ini akan sedia untuk kita lancarkan pada tahun hadapan.